



Inatsisartunut ilaasortaq
Randi Vestergaard Evaldsen
Demokraatit

Erninermit atatillugu ullormusiat pillugit § 37 naapertorlugu apeqquummut 105-2019-imut akissut

Asasara Randi Vestergaard Evaldsen

05-03-2019
Suliap normua 2019 - 5958
Akt. id. 10176660

Erninermit atatillugu ullormusiat pillugit apeqquutinnut qujanaq. Apeqquutigineqartut tullinnguuttuni ataasiakkaarlugit uteqqinneqarput akineqarlutillu.

Postboks 260
3900 Nuuk

Tlf. (+299) 34 50 00

Fax (+299) 34 66 66

E-mail: ian@nanog.gl
www.naalakkersuisut.gl

1. Arnat qassit erninerminnut atatillugu sulingiffeqanerminni sapaatip akunneranut akunnernut 40-nut ullormusiassatik tiguneq ajorpaat? Akissummi Naalakkersuisunut nalilersoqquneqarpoq arnat erninerminnut atatillugu sulingiffeqanerminni sapaatip akunneranut akunnernut 40-nut ullormusiaqartussaataasut amerlissanersut, piffissap ullormusiaqarfissap naatsorsorneqarnera sulingiffeqalernissaq sapaatit akunnerinik 13-inik sioqqullugu pisartoq soorlu assersuutigalugu sapaatip akunnerinut 21-nut kingullernut sivitsorneqartuuppat imaluunniit ukiumut kingullermut sulingiffeqarnissaq sioqqullugu.

Arnat qanoq amerlatigisut sapaatip akunneranut nalunaaquttap akunnerinut 40-nut aamma qassit nalunaaquttap akunnerinut ikinnerusunut qassinullu, erninermit atatillugu ullormusiaqartinneqartarnersut pillugit paasissutissanik peqanngilaq.

Naatsorsuinermit piffissap atorneqartup sapaatit akunnerinut 13-inut 21-inut qaffanneqarnerisa eqqorluartumik arnat atugarisaannut pitsaanerulersitsinissaa ilimanaateqanngilaq, tassami piffissat suliffeqanngiffiusinnaasut qaqugukkulluunniit pisinnaammata. Piffissap naatsorsuiffiusup sivitsorneqarnerata kingunerisinnaavaa, piffissat suliffeqanngiffiusut amerlanerusut ilaatinneqarnissaat. Taamaattoqarnerani nalunaaquttap akunnerinut agguaqatigiissisinerit apparissapput taamaalillunilu erninermit atatillugu ullormusiat aamma apparissallutik. Arnat erninermit angajoqqaatullu sulingiffeqarnermit atatillugu aningaasaqarnerat pitsanngorsarneqassappat, taava nammineq pisuussutigiginagu suliffeqanngittarneq (sila, nioqqutissiassaqqannginneq, tunisassiornermik unitsitsineq il.il. pissutigalugit) aamma napparsimaneq nalunaaquttat akunnerinik naatsorsuinermit ilaatinneqassanngillat.

2. Naalakkersuisut eqqarsaatigisinnaanerlugu piffissap ullormusiaqarfissap naatsorsorneqarnerata allanngortinnissaa sulissutigissallugu taamaattoqassappallu qanoq?

Naartunermut, erninermit meeravissiartaarnermullu atatillugu sulingiffeqartarneq pillugu Inatsisartut inatsissisaattut siunnersuummik Naalakkersuisut suliaqaleruttorput, tassuuna ilaatigut sulingiffeqarnermit ilaqutariit meerartallit tulluurtumik

pilersuinissaminnut tungaveqarnissaat qulakkeerneqassammat. Naatsorsueriaatsimut periaatsip allanngortinneqarnissaa inatsisissami takkuttussami ilaanissaa Naalackersuisut isumaliutersuutaasa ilagaat, taamaalilluni erninermut- angajoqqaatullu sulinngiffeqarnermut atatillugu pitsaanerusumik pilersorneqarnissamut tungavissiinissaq qulakkeerneqassammat.

Inatsisissatut siunnersuut Naalackersuisunit naammassineqariapat, taanna Inatsisartunut saqqummiunneqarumaarpoq.

Inussiarnersumik inuulluaqqusillunga



Martha Abelsen